

CAP. IX.

*De instructione Ministri Ecclesiae
circa confessionem & absolutionem.*

§. 1.



Um agendum hic sit de officio Ministri Ecclesiae circa Confessionem, notandum, quod licet variae sint confessiones peccatorum, tamen hoc loco sermo sit tantum de confessione, quae fit coram Ministro Ecclesiae, maximè ante usum Sacrae Coenae, & quae ei respondet, absolutione privata, quae in nostris Ecclesiis recepta est. De hac igitur sequentia Praecepta observanda sunt.

§. 2. Praeceptum. I. Minister Ecclesiae caveat sibi, ne *manifesto impium & impoenitentem ac pertinacem peccatorem*, qui scandalose in coetu Ecclesiastico vixit, ad confessionem admittat, eique absolutionem impertiatur: hac enim facilitate absolutionis Minister Ecclesiae se participem reddit alienorum peccatorum, scilicet ut impoenitens in peccatis perseveret.

§. 3. Si igitur Ecclesiae minister talem impoenitentem inter Auditores certo novit, gradus admonitionis adhibeat, ante confessionem eum ad se accersat, peccata continuata, ei ob oculos ponat, exaggeret, & periculum salutis ei monstret, atque serio ad veram contritionem & poenitentiam adhortetur: Si igitur veram & seriam poenitentiam deprehendit, dum demum ad confessionem eum admittat, & absolutionem à peccatis ejus ei impertiatur. Si vero persistit in impoenitentia, ministri est, rem deferre ad Superintendentem, vel ad Consistorium, & hujus decisionem expectare.

§. 4. Prae-